

## 004-1 【<sup>4/10</sup>說儀普周】疏鈔整理

疏鈔一/四冊·華嚴疏鈔卷一 p16~~26 · no. 004-1

整理者: 葉苾芬 · 『華嚴懸談』課程講義 · 2023 · 12

湛智海之澄波，虛含萬象。(所依定)      皎性空之滿月，頓落百川。(能說身)  
不起樹王，羅七處於法界。(說經處)      無違後際，暢九會於初成。(說經時)  
盡宏廓之幽宗，被難思之海會。(所被眾)      圓音落落，該十刹而頓周。(說經本)  
主伴重重，極十方而齊唱。(別示說儀)

### 【湛智海之澄波，虛含萬象】· (所依定)

#### 一、明所依定者：

1 說經所依三昧者，如說法華依無量義處三昧·說般若經依等持王三昧·  
說涅槃經依不動三昧·故說諸經多依三昧。

2 今說此經依何三昧·即**海印三昧**。海印是喻·從喻受名·**賢首品疏**當廣說之·

#### 3 今略示其相：

<sup>1</sup> 謂香海澄渟湛然不動·四天下中色身形象·皆於其中而有印文·如印印物·  
亦猶澄波萬頃·晴天無雲·列宿星月·炳然齊現·  
無來無去·非有非無·不一不異。

<sup>2</sup> 如來智海識浪不生·澄渟清淨至明至靜·

無心頓現一切眾生心念根欲·心念根欲並在智中·如海含象。

<sup>3</sup> 故經云「如海普現眾生身·以此說名為大海·

菩提普印諸心行·是故正覺名無量」。

<sup>4</sup> 非唯智現物心·亦依此智頓現萬象普應諸類·

#### 賢首品云

「或現童男童女形·天龍及以阿修羅·乃至摩睺羅伽等·隨其所樂悉令見·

眾生形相各不同·行業音聲亦無量·如是一切皆能現·海印三昧威神力」

<sup>5</sup> 然此文中言含法喻：

智即是法·海即是喻·識浪既停云湛智海·

無心頓現故曰**虛含**·能應所應皆為**萬象**。

## 二、【皎性空之滿月·頓落百川】者，明『能應之身』：

1 此之兩句，惟「性」字是法，餘皆是喻，以性該之皆合法喻。謂：

若秋空朗月皎淨無瑕，萬器百川不分而遍。

2 「性空」即所依法體，「滿月」即實報智圓，「百川」即喻物機，影落便為變化。

3 故佛之智月全依性空，惑盡德圓無心頓應。

4 故出現品云：

「譬如淨月在虛空，能蔽眾星示盈缺，一切水中皆現影，諸有觀瞻悉對前。

如來身月亦復然，能蔽餘乘示脩短，普現天人淨心水，一切皆謂對其前」。

5 智幢菩薩偈云「譬如淨滿月，普現一切水，影象雖無量，本月未曾二。

如來無礙智，成就等正覺，普現一切剎，佛體亦無二」。

6 此則水亦喻剎。若準離世間品亦喻菩薩，偈云

「譬如淨日月，皎鏡在虛空，影現於眾水，不為水所雜。

菩薩淨法輪，當知亦如是，現世間心水，不為世所雜」，則亦以月喻所說法。

7 上皆空月不同，若以相歸性，則空亦名佛。

故一切慧菩薩云

「法性本空寂，無取亦無見，性空即是佛，不可得思量」。

則空色照水，影落晴天，天猶空也。

## 三、【不起樹王，羅七處於法界】者，明『說經之處：意取七處』故。

1 「樹王」者，即菩提樹，謂畢鉢羅樹：此樹高聳，獨出眾樹，故稱為王。

2 「不起」者：謂不起菩提樹而昇忉利天等，故經云

「爾時世尊不離一切菩提樹下而上昇須彌向帝釋殿」。

法慧菩薩偈云「佛子汝應觀，如來自在力，一切閻浮提，皆言佛在中。

我等今見佛，住於須彌頂，十方悉亦然，如來自在力」。

3 三天皆有不起而昇之言，故彼成四句：

<sup>1</sup> 不起一切菩提樹而昇一天，如前經文，(二、四兩句取其結例之文，謂十方悉亦然)

<sup>2</sup> 不起一處而昇一切處，(取「一閻浮對一切忉利」是第二句)

<sup>3</sup> 不起一處而昇一處，(其第三句易故文無，義必合有)

<sup>4</sup> 不起一切處而昇一切處。(取前「一切閻浮提對一切忉利」亦然，則是第四句)

4 是則「不起法界菩提樹，遍昇法界七處」。

## 【羅七處於法界】者，

略有二意：（一）令遍法界中皆有七處。（二）令一一處皆遍法界。

### （一）令遍法界中皆有七處者：

1 若約自狹之寬說遍，應如下說處中，十重之內遍於中八。

以初一是能遍七處，十是例餘佛故。然下十重是約佛遍於處。

2 今明『處遍於處』自有二義耳。①所依之處既遍法界，②能依之身，居然遍也。

今直就遍法界言，略有五重：

1 遍法界同類剎中皆有七處。

2 遍法界異類剎中有七處。

3 遍法界微塵中剎亦有七處

4 遍法界虛空容塵之處亦有七處。

5 遍法界帝網剎中亦有七處。

### （二）令一一處遍(法界)者：

1 如菩提場遍法界，則普光明中亦有菩提場，忉利天中亦有菩提場。

夜摩兜率等七處一一皆有菩提場。

2 如遍七處，亦遍非七處之處，如化樂四王色界十八等非說經處，

今菩提場亦遍於彼。

3 如菩提場處遍，其七處，一一皆遍七處，乃至法界。此亦有五：

1 遍同類剎。

2 遍異類剎。

3 遍法界塵。

4 遍虛空容塵之處。

5 遍法界帝網剎。

4 更細而論，非但一一處遍，隨一一塵皆遍法界五重之處，是則一處中有一切處。

\*\*上二重釋遍，皆遍五類。

五類之中：前三<sup>1~3</sup>約事法界。

次一<sup>4</sup>通事理，理空事空故。

後一<sup>5</sup>事事無礙法界：

由事即理，事理無礙故，以理融事，遍於重重，皆是如來說經之處。

四【無違後際，暢九會於初成】者：明『說經時』，即始成正覺時。

1 然有兩說，各是一師之義，以無違兩字會通：

① 謂菩提流支，

<sup>1</sup> 則以前五會是初成即說，以經初云始成正覺故，三天皆云不起而昇故。

<sup>2</sup> 第六會已下，是第二七日後說，以別行十地經初云，

「婆伽婆成道未久，第二七日」故。

<sup>3</sup> 例此則第九一會在後時說，以有身子祇樹等故。

② 賢首，則以初成頓說九會之文。今會取賢首。

<sup>1</sup> 既指歸云，「常恆之說，前後際而無涯」，則在後時無過，故云無違後際。

<sup>2</sup> 後際即通第九會在後時說，故不妨後際，而宣暢九會在於初成。

2 上來分於三時，約「所表」故，初成頓演約「圓融」故。

3 又分三時者，以法就機故，能頓說者，約佛德能，能頓演故。

以初後相即故，故云『無違後際』，不妨初成頓彰九會。

4 經云 「一念即無量劫，無量劫即一念」。

故晉經十住品云「過去無量劫，安置未來今，未來無量劫，迴置過去世，

非長亦非短，解脫人所行」。

5 多劫不乖剎那，初成豈妨後際。上之二段，廣如教緣中辨。

五【盡宏廓之幽宗，被難思之海會】者，明『所被眾』也：

1 然上句略明經義以為能被，義在旨趣之中，今為成所被，故略舉能耳。

2 「宏」者，大也。「廓」者，空也。「幽」者，深也。

3 下句所被：云「被難思之海會」者，以深廣故：

<sup>1</sup> 謂普賢等，眾德深齊佛、數廣剎塵，故稱為海。

<sup>2</sup> 深超情表，是不可思。數廣難量，亦不可思。（難思）

<sup>3</sup> 即深而廣，不可作深思。即廣而深，不可為廣思。

<sup>4</sup> 真應權實，類例多端，又不可思。該徹果海尤不可思。

4 故初會云「有十佛剎微塵數菩薩所共圍繞」，略列四十二眾，皆以剎塵無量而為其量。況口光所召一一菩薩，各領世界海微塵數菩薩，以為眷屬來至此會。

5 毛光重現周入剎塵，依正作用該攝三際。

諸大菩薩尚不能思，豈況凡情測其涯際，故云【難思之海會】。

六【圓音落落·該十刹而頓周】者：明『說經本』也，本即圓音：

1「落落」者：疏遠聲也。

2「十刹」者：謂樹形等異類之刹。

經列二十·結有十佛刹塵·舉十以彰無盡故·故云十刹。

3圓音之義·下當廣說·略而言之：

<sup>1</sup>一音之中具一切音名曰圓音· <sup>2</sup>一切音聲即是一音·亦名一音·

<sup>3</sup>一多無礙總曰圓音·經云

「佛以一妙音·周聞十方刹·眾音悉具足·法雨皆充遍·

一切言辭海·一切隨類音·一切佛刹中·轉於淨法輪」·皆圓音義也。

4十刹齊聞·無有前後故名為頓·法界十刹·無所不聞·故名曰周。

七【主伴重重·極十方而齊唱】者·別示『說儀』也：

1謂是通方之說·舉一為主·十方為伴。

2諸佛菩薩皆有主伴·遞互相望盡於十方·隨一為主·十方為伴·

3隣次相壓·故曰重重·然相猶難明·今復略示：

(1)言「諸佛菩薩皆有主伴」者·略有三句：

①果主果伴：謂遮那為主·十方佛為伴·十方佛為主·遮那為伴。

②因主因伴：謂此方法慧菩薩為主·十方法慧菩薩為伴·

十方菩薩為主·此方菩薩為伴。

③果主因伴：謂如來為主·普賢等為伴·此一亦名輔翼·亦得稱伴·

彼佛為主·此方菩薩為伴·如法慧說法十方佛證·但名證法諸佛·

不名因主果伴·設爾為伴·自望本佛而為主故。

(2)言「隣次相壓·故曰重重」者·略有二義：

①『此彼互望』：

<sup>1</sup>如遮那為主·十方諸佛為伴·

<sup>2</sup>此界之東阿閼如來為主·此土遮那與十方諸佛為伴·

<sup>3</sup>次東第二佛為主·遮那與東第一佛及十方佛為伴·

<sup>4</sup>則隨一佛·有法界諸佛重數·<sup>5</sup>如十人為主伴·遞互相望·便為十重主伴·

<sup>6</sup>如佛佛既爾·佛主菩薩伴亦然·因主既爾·因伴亦然·此一義中自有三義

② 如『遮那一佛為主·十方菩薩為伴』。

主佛既遍·伴亦隨遍：謂

<sup>1</sup>遮那處普光堂·東方十佛剎塵數界外·

有金色世界文殊而來為伴·十方菩薩皆去十剎而來。

<sup>2</sup>若此主佛向東一界坐蓮華座·金色文殊來亦不相近·還去十佛剎塵數外。

<sup>3</sup>如長空明月列宿圍繞·萬器百川星月炳現。月如主佛·列宿如伴·

——水中遠近皆現。

<sup>4</sup>義當金色近東一界·

其西蓮華色世界財首菩薩亦移近東一界·餘之八方皆移近東一界。

<sup>5</sup>如是主佛·至東十佛剎塵數界外·坐蓮華藏師子之座·正當本金色界處·

<sup>6</sup>由主佛至彼·其金色界近東亦十佛剎塵數界外·

<sup>7</sup>其西方蓮華色界·則正當娑婆之處。

<sup>8</sup>如是主佛極於東方·金色等伴剎亦極東方·

終不見文殊從西向東來近主佛·亦不見文殊從佛前過向西近佛。

<sup>9</sup>如是主佛極於西方·亦不見有西方菩薩從東過西來近主佛。

<sup>10</sup>十方皆爾。

<sup>11</sup>如人以十錢布地·錢心為主·錢緣為伴·

第一錢當中·以第二錢壓第一錢上近東一緣之地·

則開元通寶等皆亦近東一緣之地·如是錢錢重重相壓皆漸近東。

<sup>12</sup>如近東既爾·更十錢近西亦然。

<sup>13</sup>說一十信·則已重重周於十方·

如是第三會說十住時·亦如說信·重重遍於十方·行向地等皆然·

則九會為九重重·

<sup>14</sup>如第一會重重遍法界·第二會重重還在第一會重重之上·

則九會自為九箇重重。

<sup>15</sup>若四十八會為四十八重重·若無盡會有無盡重重·

<sup>16</sup>此一佛為主·餘菩薩為伴·重重如是。

十方佛為主·十方菩薩為伴·重重亦然。

<sup>17</sup>如是諸佛重重復互相遍·故云主伴重重·極十方而齊唱。

餘義至教起因緣中辨。

然上『七對有其六身』：

初、所依海印三昧即是**智身**·湛智海故。

二、說法之身為**化身**·謂如水分千月故。

三、說經處是**意生身**·隨意遍於法界處故。

四、說經時即**力持身**·持令永久故。

五、被難思海會即**威勢身**·菩薩眾中威光赫奕故。

六、圓音、**相好莊嚴身**

七、主伴，皆**相好莊嚴身**。圓音即一相·主伴即坐蓮華藏師子之座·具相好故。

此段有六(身)：前說**主難思**已有**四身**·則**十身具矣**·

意云·**十身初滿即說此經**。

然疏本意·正示**說儀等異**·含具**十身**·故有**三兩身名**·不全昭著。